

Pa su 40 aña di programa Cruzando Aña:

Asociacion Broadcasting Aruba a otorga Roberto Geerman plaqueette di reconocimiento



ORANJESTAD (AAN)—Asociacion di Broadcasting Aruba a otorga un plaqueette di reconocimiento na sr. Roberto Geerman, e presentador di Cruzando Aña, pa e di 40 Aniversario di e programa aki, den nomber di tur colega di Radiodifusion local.

E plaqueette a wordo entrega for di man di sr. Aldrich Croes, director di Hits100 FM. Sr. Croes a expresa cu no tin otro locutor cu por presenta miho e programa aki, y el a felicite pa su logro bunita aki, Cruzando Aña pa nos pais Aruba.

Sr. Roberto Geerman a expresa su mes bastante emociona gradiciendo tur esnan cu ta forma parti di e Asociacion di Broadcasting Aruba, y na sr. Simon Arends. El a menciona cu e ta aprecia e reconocimiento aki masha hopi mes, unda e tin 40 aña haciendo algo cu e gusta.

El a comenta cu hopi hende tin un ofishi of un profesion como trabao y banda di dje tin un hobby. Den su caso radiodifusion ta su

hobby y su profesion.

E evento aki a tuma lugar na Galactica, y famia di sr. Geerman tambe tabata presente. El a hunto cu e otro radioemisoranan cu ta forma parti di e Asociacion, y despues di un rato a join e conteo di aña. Geerman expresa palabranan di danki pa e reconocimiento aki.

Pa conclui sr. Aldrich Croes a bisa sr. Geerman cu e reconocimiento aki ta hopi bon mereci, y cu ademas di esey el a haci di e trabao aki un icono. E icononan cu tin 30 of 40 aña den e trabao aki no ta hopi. El a señala cu hunto cu e profesion aki ta hopi particular pero sr. Geerman a haci di e trabao aki algo unico y e, y ningun otro, merece tur e honor aki. Y nan ta entregu'e e ondanan radial pa sr. Geerman entretene nos comunidad pa ricibi aña cu hopi alegria y optimismo. El a expresa palabranan di pabien, extensivo na sr. Geerman su famia, sr. Simon Arends y henter e team di Galactica.

